



Klære for Telenorkarusellen: Leiar Cathrine Haugland, nestleiar Bjørn Olav Tveit og altmogelegmann Steinar Haugland. (Foto: Ola Matti Mathisen)

**"Sekkeløp" var eit fast innslag i 17-mai-løyene i gamle dagar, men no er det flytta til den vinterlege årstida og løpet skal gå føre seg i skisenteret på Fjellhaugen! Men det er nødvendig å presisera at det gjeld eit løp på ski og at sekkane er til dei som deltek.**

Det er den såkalla Telenorkarusellen det gjeld og alle mellom seks og 12 år kan vera med i den. Opplegget er også sponsa av Norges Skiforbund.

Karusellen vert avvikla onsdag 7. februar og søndag 18. mars og dei som er med begge gongane får solide og forseggjorte "Telenor-sekkar" og i tillegg diplom. Løpet er i fristil, det vert altså ikkje stilt krav til nokon bestemt teknikk for dei som deltek..

Det var tilsaman 290 idrottslag som søkte om å få bli med i karusellen og ski- og friidrettsgruppa her i Uskedalen var blant 150 heldige, opplyser leiar Cathrine Haugland til uskedalen.no.

- Men det er også ein annan karusell på gong...

- Jau, det er den tradisjonelle Kvinnherad-skikarusellen, som startar kommande søndag og som omfattar fire renn der tre er teljande. Rennet den 7. februar er også med i denne karusellen.

Rennet 18. mars er – i tråd med det som er dagens populære trend – eit sprintopplegg inne på "stadion". Det er fine føreforhold i Fjellhaugen no og gruppas ansvarlege ser verkeleg fram til at sesongen kjem i gang for alvor. Det har vore opptil 60 deltakarar i barneskirenn når snøtilhøva har lege til rette for det. Og familietrimmen som gruppa starta med i fjor haust og som har vore ein storg suksess har framleis stor deltaking. Det var rundt 35 som møtte fram i Aktivitetshuset denne måndagen!

Av Ola Matti Mathisen